



册府元龜
卷之百六十二
至六十四



13
849
57



門 1 3
第 849
卷 57



册府元龜

淮南李嗣京奏聞

西極文翔鳳訂正

豫章黃國珩較釋

帝王部

一百六十二

命使第二

唐中宗神龍二年二月遣十使巡察風俗下制曰古
之御天下者以大寶為公器以崇高為外物仰則乾
行順性命之理俛思坤載成博厚之德將以財成至
道保邦靜人用清三微臣欽若等曰三微者天地人
三正之始萬物皆微故王者

冊元命使二
法以齊七政能臻夫此者豈一人之力哉實賴羣方
共康庶績自李葉淪替洎棄公道官匪其人教無所
習懷才修潔者則依違以自容通方宏偉者則放蕩
以求利繇是淳化日消澆風歲長典章訛弊吐俗凋
殘逶迤陵頽莫能振理朕以薄德丕承寶命夙夜惟
寅憂勞無怠昧旦端冕心被寰瀛日晏罷朝念周黎
庶頃者勵精推擇傍求牧宰冀聞善政惠康乃又虛
已勵勤美化猶怠貪官傲吏屢黷於爰書失職流亾
幾淪於板籍豈刑賞之柄不協其中將仁恩之誠未
孚於下永言國本良深軫悼古者天子巡狩省方觀

俗而錫鑾備駕或以爲煩故分命輶軒博採謠訟將
以彰善癉惡激濁揚清散皇明以燭幽揚仁風以被
物實資令德允屬通才惟懷永圖式鑒成憲宜於左
右臺及內外五品以上官識理通明立性堅白無所
詘撓志在澄清者二十人分爲十道巡察使二周年
一替以廉案州部俾其董政郡吏觀撫兆人議獄緩
刑扶危拯滯若能抗詞直筆不憚權豪仁恕爲懷黜
陟咸當別加獎擢優以名器如脂韋苟全蘧蔭戚施
高下在心顧望依附者將遷削平棄蕭以憲章咸竭
廼心以副朕意遂命易州刺史姜師度攝右御史以

充此使

景龍三年八月遣十使巡察天下

睿宗唐隆元年六月庚子平韋庶人壬寅降十道使

齋璽書宣撫

景雲元年八月制出十道使持節巡撫天下

二年二月降十道使按察

七月分遣都督刺史十道按察

十一月出十道使巡撫

太極元年二月出十道使巡撫

玄宗先天元年太上皇詔曰朕恭已無為留神玄默

俯順曆數僉謀公卿式命元子祗膺寶位今庶政道

新光華肇啟但恐天下至廣未達朕心故臨遣使臣

宣揚朝典宜以膳部郎中蕭瑗為河南道宣勞使諫

議大夫楊虛受為河北道宣勞使贊善大夫薛植為

淮南道宣勞使殿中丞薛麟為隴右道宣勞使宗正

卿姜晞為河東道宣勞使司門郎中李誠為關內道

宣勞使工部郎中高紹為劔南道宣勞使太子右諭

德蕭憲為山南道宣勞使宋王府司馬裴綱為江南

道宣勞使諫議大夫寧悌原為嶺南道宣勞使

二年七月壬申命益州長史畢構宣撫劔南及山南

道少府監齊景胃宣撫關內及河東道太子右庶子
陸餘慶宣撫河北道宗正少卿韋瑱宣撫江南及淮
南道光祿少卿杜元逞宣撫隴右道廣州都督周利
貞宣撫嶺南道制曰昔者明王之御天下也內有公
卿允釐庶績外有方伯司牧羣黎猶懼至道未孚淳
風或替故有巡狩之典黜幽陟明行人之官省方察
俗用能遐邇咸乂情偽無遺於變時雍率其道也朕
祇膺嗣德恭守帝圖上稟過度之謨下憑衆庶之立
竭精思理兩載于茲冀逮小康漸躋至化而區宇遐
曠風教未同負辰長懷責深在已近者姦回構釁竊

起蕭牆宗社降靈應時殲殄今又恭承聖訓總統大
猷率彼百官齊茲七政恐倉廩不實禮節未興吏靡
息於貪殘人或滯於幽枉永言於此明發疚懷今卜
征未習時邁仍遠宜分命輶軒慰撫黎庶畢構等竝
操履公清識見明允茂績彰於歷試嘉譽沛於周行
宜膺行李載光原隰所至之處申諭朕心竝令屏絕
浮華敦崇仁厚務修孝悌勤事農桑耆老鰥惇征人
家口不自存者咸加恤問德舉言揚唯賢是急若有
良材異行藏器下僚哲人奇士隱淪屠釣審知才行
灼然者各以名聞凡百牧宰洎乎吏人咸悉朕心各

敬廼事勤則不匱仁遠乎哉勉矣勗之以副朕心
開元二年四月己巳勅曰淮海唯楊是稱谿險山川
重復水陸殷湊去歲田收稍垂豐稔今茲人庶頗致
饑乏朕爲之父母深用惕然近聞雨澤應節秔稻有
望目前之困餬口猶切思從蠲省用救荒弊宜令給
事中楊虛受往江東道安撫存問觀察疾苦詳理寬
滯百姓間有偉才異行藏鱗戢羽隱淪屠博栖遲閭
閻官人內有貪冒苟得背公徇私或修己自守養望
克位者還日各以名聞所至之州具令宣布求瘼恤
隱稱朕意焉

五年二月詔曰伊昔明王奉若天道所寶惟穀所仗
惟賢故能務穡勸農興利除害朕以薄德纂承洪緒
政期克已誠不動天頃歲河南河北諸州皇亟爲患
雖當道遣使除瘞恐今又生育天戒若此朕甚懼焉
罪實在予殃豈移歲且牧宰之任朝廷所委苟得良
才式敷惠訓古有壽張飛逝中牟不入者斯其効也
刺史縣令等當各竭乃心用攘厥患方考休咎大明
黜陟惟爾凡百可不勉哉宜令戶部郎中蔡容往河
北道侍御史崔喬往河南道觀察風俗問利害便與
州縣籌度隨事處置還日奏聞

六年八月辛巳詔曰朕自臨御天下介于人上萬邦在念百姓爲心慎日以兢因時載惕春茲茂育寧忘監寐今歲河南諸州頗多水潦稼穡不稔閭閻阻饑方屬西巡更深東顧不加存問孰副憂軫宜令工部尚書劉知柔馳驛充使往河南道巡歷簡問應免租庸及賑恤並量事便處分兼察人民冤苦官吏善惡還日奏聞宋毫陳許之間遭澇尤甚其應緣賑恤宜倍優賞

八年五月置十道按察使八月以御史大夫王昶充關內道按察使楊州長史王怡充淮南道按察使右庶子齊澣充河南道按察使少府監湯孚充劔南道按察使秦州都督張守潔充隴右道按察使荊州長史盧逸充山南道按察使鴻臚少卿蕭嵩充河南道案察使襄州刺史裴觀爲梁州都督山南道按察使潤州刺史趙升卿充江南東道按察使宣州刺史霍廷王克淮南西道按察使仍下制曰苛慝不作民斯無怨寬猛相濟政是以和故周禮以官刑糾邦理以官敘正羣吏允迪前列式惟舊章且夫寰宇至大不可以周覽黎甿至殷不可以獨化熙我庶政實惟舊察苟非其才罔以親理朕惟是夙夜不遑安寧開元

之初分遣案部糾擿姦犯頗聞懲息以其辜久則煩
尋亦從其停廢縣以歲月寢成寬弛今聞在外官寮
多違憲法牧守則寄任茲重令長則祿秩且優亟聞
侵竊屢有章奏雖賜金爲惠未愧張武之心還珠表
德罕見孟嘗之政豈敦諭之意未孚於就列將貞高
之節有謝於前修永懷於此良用沉歎且政寬而慢
法弊則通弛而張之其可致理御史大夫王駿等竝
識通政要位以才達茂其聲實弘此憲章宜分遣巡
案以時糾察巡內有長吏貪擾獄訟寃滯暗懦尸祿
苛虐在官卽宜隨事案舉所犯狀竝推勘准格斷覆

訖奏聞仍便覆囚夫牧宰之職教導是先錄曹之任
紀綱斯在其有政理殊尤清直獨立者咸以名薦餘
官有清白者稱及諸色不善各別爲科日同狀奏聞
其尋嘗平狀竝不須通俾夫善取其尤罰無所濫踈
而不漏察而不苛必將正其源流弘彼綱目不可總
此煩碎擾其吏人應是州縣嘗務事非損益者使人
更不必干預其百姓有不支濟應須處置事狀不便
於釐革者與州縣商量處分訖奏聞以副虛佇之心
以光澄清之舉

九年八月詔曰朕身居九重心在萬姓恐情未達下

政或乖方頃者故命近臣分道巡撫爲屬農月且停使車今秋稼方收時亦將隙命中書舍人何鸞等宜所到之處宣慰百姓令悉朕懷其有水旱之州或須貸給不可遠更奏聞宜便量事處置征鎮之家各令州縣簡較優賞其中無兼丁存濟者仍加賑恤

十一年五月命左拾遺徐楚璧大理丞王琇大理評事宋詞班景倩河南府法曹參軍元將茂大原府司錄參軍張珣大原府兵曹參軍宋希王長安縣主簿韋利涉長安縣尉王永維陽王簿劉日正長安縣尉裴寬萬年縣尉崔希逸三原縣尉喬夢松告成縣尉

徐鏐汜水縣尉薛侃同州司法參軍邊冲寂分州錄事參軍韋洽榆次縣尉郭庭等攝監察御史分巡諸道詔曰國之三典令于四方歲終則巡聽其獄訟頃因水旱貨食不足或徭稅徵逸多不折衷或租調蠲除事涉欺隱皆吏之不稱政之不修是用命茲使臣委其詳覆徐楚璧等竝清白自立茂有政聲必使事合權宜刑無冤濫不損於物有益於公往敷厥休副茲推擇竝可攝監察御史勾當租庸地稅兼覆囚十三年正月制天下見禁囚徒死罪降至流流已下悉原之都城內委中書門下當日疏決處分京城委

劉守制到日處分仍令中丞蔣欽緒往河南大理少
卿明珪往關內刑部郎中張樽往河東兵部郎中崔
珣往山南東道右庶子高仲舒往江西道職方郎鄭
續之往劔南道秘書丞張履冰往淮南道殿中侍御
史孫濟往隴右道贊善大夫張景幽往河西道右論
德李林甫往山南西道主客郎中張烈往江南東道
竝郎馳驛發遣所至之處疏決囚徒宣慰百姓其有
窮乏者不自存濟及侍老征人之家有疾苦者各令
州縣量加醫療及賑恤其嶺南五府磧西四鎮非流
配效力等見禁囚徒各委節度使及本管都督府處

分布告遐邇知朕意焉

十四年七月詔曰朕撫有天下寅畏上玄思保太和
用康庶類頃秋夏之際水潦不時懷鄭許滑衛等州
皆遭泛溢苗稼潦漬屋宇傾摧有切納隍之憂良深
在予之責宜令右監門衛將軍知內侍省事黎敬仁
速往宣慰如有遭損之處應須營助賑給竝委使與
州縣相知量事處置及所在堤堰不穩便者簡行具
利害奏聞

九月詔曰頃秋夏之間水潦方降閭閻損壞稼穡漂
淪嘗恐一物之違况乃數州之弊故發中使循于外

臺章奏屢聞州鄉稍輯朕視之如子若納諸隍于再于三情猶馭朽審求人瘼更遣信臣中丞兼戶部侍中宇文融忠文竭誠夙夜匪懈當安人之任有利簡之能眷被使乎宜膺其選可往河南河北道遭水諸州宣撫仍審察有不支濟者宜更量加賑貸若屋宇損壞牛畜俱盡及征人家不能自存立者量事助其脩葺其有官吏縱捨賑給不均亦須糾正回日奏聞

十五年三月制曰河北遭水處城旁及諸蕃殺降人先令安置及編州縣被差征行人家口等去年水澇漂損田苗頗遣使人所在巡撫兼令州縣倍加矜恤不知竝得安存否以今舊穀旣沒新麥未登丁壯旣差遠行老少慮不支濟朕居黃屋念在蒼生每思優養無忘鑒寐今故遣中使左監門衛將軍李善才重此宣慰宜令州縣卽時簡責有乏絕者准例給糧俾令安堵以副朕心

七月詔曰同州鄜州近屬霖雨稍多水潦爲害念彼黎人載懷憂惕宜令侍御史劉彥回乘傳宣慰其有百姓屋宇田苗被漂損者量事賑恤

八月制曰河北州縣水災尤甚言念蒸人何以自給

朕當宁興想有勞肝曷在予之責用軫于懷宜令所司量支東都租米二十萬石賑給乃令魏州刺史宇文融克宣撫使便巡撫水損應須憂恤及合折免并存閭舍一事已上與州縣相知逐穩便處置務從簡易勿致勞擾

十六年九月詔曰河南道宋毫許仙徐鄆濮兗州奏旱損田宜令右監門衛大將軍黎敬仁往彼巡問如有不支濟戶應須賑恤與州縣長官相知量事處置訖回日具狀奏聞

二十一年二月以簡較尚書右丞相皇甫翼充河南淮南道宣慰使簡較尚書吏部侍郎劉彤充江東江西道宣慰使尚書兵部侍郎李鎮充山南道宣慰使制曰去年江南淮南有微遭旱處河南數州亦有水損百姓等皇甫翼等咸謂能賢式將朕命其間乏絕應須賑貸便量事處置回日奏聞

四月以久旱命太子少保陸象先戶部尚書杜暹等七人往諸道宣慰賑給仍令黜陟官吏踈決囚徒二十三年二月壬寅詔曰秦州地震謫見后土朕每克念何以臻茲仲尼有云丘禱久矣而精意以告或通神明徐國公蕭嵩地在輔弼朝之端右欲重將命

暫爲此行宜往秦州致祭山川凡緣所損百姓間事
皆委嵩隨事處置四日以聞

辛亥初置十道採訪處置使命御史中丞盧絢爲都
畿採訪使御史中丞裴曠爲京畿採訪使國子祭酒
汴州刺史嗣魯王道堅爲河南道採訪使華州刺史
李尚隱爲關內道採訪使太原尹崔隱甫爲河東道
採訪使禮部侍郎兼魏州刺史宋瑤爲河北道採訪
使太常卿廣州事嶺南經畧使李朝隱爲嶺南道採
訪使揚州長史韋虛心爲淮南採訪使太僕卿兼荆
涼州都督持節河西節度等副大使牛仙客爲河西

道採訪使益州長史持節劍南節度副大使王昱爲
劍南道採訪使荊州長史韓朝宗爲山南道採訪使
潤州刺史劉日正爲江南道採訪使秦州刺史裴敦
復爲隴右道採訪使梁州刺史宋詢爲山南西道採
訪使宣州刺史班景倩爲江南道採訪使詔曰言念
蒼生心必徧於天下自古良牧福猶潤於京師所以
歷選列城聿求連率豈徒刺察將委輯寧朝散大夫
簡較御史中丞關內宣諭賑給使上柱國盧絢等任
奇已深聲實蕪茂咸貫通於理道益純固於公心或
華髮不衰或白珪無玷可以軌儀郡國康濟黎元間

歲已來數州失稔頗致流冗能勿軫懷而吏或不畏不仁或不安不便誠須矯過必任仗賢而前此使輦下無殷鑒事皆制時務欲總權小有舉於毫髮大莫振於綱領本命條舉却用煩苛未言所期豈云目弊今既各膺重寄允於通才以蠲疾苦之源當協大中

之義若今行一道利及萬人朕所設官以俟能者朝之優秩上歸令譽言可復也宜副朕懷

十一月詔令給事中韋嘗巡關內道中書舍人李彭年巡河南道竝與本道採訪使及所繇長官商量回

日奏聞

二十九年五月命大理卿崔翹尚書右丞席豫工部

侍郎郭虛已御史中丞張倚中書舍人孫逖給事中

趙安貞太常卿韋嘗班景倩分行天下詔曰三載考

績以鑒吏能八使觀風因求民瘼茲事體大致理之

繇朕受命昊穹臨御寰夏慮乎一物有所不安偏於

萬方無忘軫念而宇宙之內官吏至多倘有政失其

宜卽萬人受弊崔翹等或文學有稱或貞白流譽通

於理道勵是公心俾爾澄清或當委寄至於陟黜之

道國之所務苟有不當將何勸人頃年使例皆通狀

其盡善者多有請求爲選調之資不善者以凡碎見

輕貴奏課之數若此銜命豈副虛懷卿等所到之州宜具宣朕意其百姓間事或有須釐革者宜與所繇長官商量處置即日奏聞其官吏中有貪冒賍私其犯名教或衰老疾病無政理者刺史已下宜停務奏聞其守職公清爲政尤異事堪激勸遠近知者具以名聞其諸道有遭損下人應須賑給先頻有處分猶慮艱弊豈忘矜恤亦宜審與州縣商量務令周濟又聞河堤穿決致有漂流諒繇州縣寬疎不時修塞亦便簡行處置勿使更然其天下道學固已有置者并鄉學等此竝切於生人比來興置蓋爲教導各宜敦

勸使有成益其征鎮之間或有單貧老弱不自存濟者宜令所繇倍加優賞其浮寄逃戶等亦頻處分頃來招携未有長策又江淮之間有深居山洞多不屬州縣自謂莫徭何得因循致使如此竝與州縣商量處置一時錄奏卿等旣當巡按受委非輕是宜勉爾良畬以副朝選無或致有迴避不竭公忠朕之責成深宜自効

天寶五年正月命禮部尚書席豫御史中丞王鉷蕭隱之諫議大夫韋見素李麟尚書左丞崔翹鴻臚少卿源光譽分道巡按天下風俗及黜陟官吏詔曰黜

幽陟明所以察風俗求瘼恤隱所以慰黎庶不有其人孰可將命禮部尚書席豫等亮直清節其經通大才多識前言往行時政或久應任使嘗參八政之列或夙蘊忠公必副四方之委未懷兆庶用寄澄清豫巡河北道銜巡京畿關內及河東道隱之巡東畿及河南道見素巡山南東道江南西道黔中嶺南等道麟巡河西隴西磧西等道翹巡劔南及山南西道光譽巡淮南及江南東道其百姓之間及官吏之輩如事或未該須有釐革者仍委量事處置回日奏聞其嶺南黔中磧西途路遙遠若使臣一一自到慮有稽

遲任各精擇判官准舊例分往

十四年三月給事中裴士淹禮部侍郎楊浚太常少卿姚子彥往河南河北江淮宣慰

肅宗至德二年十二月大赦令中書門下簡使印分道宣慰所至郡縣審問百姓間有利害有瀕釐革處置者一一奏聞

代宗廣德二年三月庚戌詔曰歲之不易征賦繁興河南蕭然江外尤劇供上都之國用給諸道之軍頒庶務徵求未遑小息火耕水耨夏葛冬裘充饋運而屢空支戎衣而不足農人少而轉困編戶流而罕歸

自北之化未淳大東之詞方切君爲心也朕甚痛然
今區宇漸寧凋殘已甚惕然恭已姑務息人懼惇嫠
之無告思省方以親問時邁未可日晏增勞載懷鴻
鴈之詩用解吾人之恤必資循行悉以周爰皇皇者
華申諭朕志宜令太子賓客兼御史大夫劉晏往諸
道宣慰應百姓有徵科煩重人戶逃亡及水旱所損
不能支濟者竝與本道節度使計會蠲削安存遂便
處置訖具狀聞奏官吏之政在邦必聞知無不爲公
道斯在其租庸使及刺史縣令錄事參軍有精於政
理及賦役均平州縣之間稱爲良吏者具名聞奏別

有甄異如或殘忍慢法貪污敗官有害於人不應特
務者亦具狀以聞仍與本道觀察節度使會計舉按
四海至廣九重至深思使下情上通嘗令上旨下達
務以審慎稱朕意焉

大曆二年八月以潭衡水灾命給事中賀若察使於

湖南宣慰

九月命比部員外郎莫藏用使於嶺南宣慰

十二年八月以京畿水旱分命御史巡苗

德宗卽位初湖南山洞中王國良者聚衆爲盜都官
員外郎關播往宣慰之臨行召對於別殿播奏曰臣

自今奉詔撫國良如不受命臣請便宣恩命詰鄰州速出兵翦除帝曰卿言深合朕意

建中元年二月發黜陟使分往天下以右司郎中兼侍御史庾何巡京畿職方郎中劉灣往關內刑部員外郎裴伯言往河東澤潞磁邢等道司勳郎中韋禎往山南西道劔南東西川禮部郎中趙贊往山東荆南黔中湖南等道諫議大夫吳經綸往魏博成德幽州等道給事中盧翰往河南淄青東都畿等道吏部郎中李承往淮西淮南等道諫議大夫柳載往浙江東西道刑部郎中鄭叔則往江南江西福建等道禮

部員外衛晏往嶺南五管詔曰朕聞唐虞聖人之理三載考績黜陟幽明兩漢施教之君亦命八使澄清天下朕纂承大業思服訓謩雖王公卿士內勤夙夜藩岳守將外盡公忠而兵革未寧戎狄未盡紀綱未振法令未敷封圻郡縣賦稅不一師旅上下勞逸不均所以終宵積憂寤寐增惕爰命羣士往代予言行乎四方以聽于理舉其百事以歸于正朕之深顧可不勤副也

興元元年正月帝在奉天詔曰古者天子有巡狩之義以考國典以觀人風在時多虞良或未暇乃命卿

士使于四方問人疾苦廉吏善惡苟副所任則如親臨在理平之時尚資勤恤况流散之後得無省憂朕以不敏不明肆于人上撫育失道誠信未孚寇盜繁興阻兵拒命哀我臣庶陷于匪人顧茲田疇鞠爲茂草不念柔服遂命徂征徵發甲兵暴露營壘冒于鋒刃繼以死傷農工廢棄其生業商賈咨嗟於道路軍戎日益閭巷日空凋瘵愈窮費用愈衆以財力之有限供求取之無涯怨氣上騰咎徵斯應疫厲薦至水旱相乘人罹于灾誰任其責朕自嗣位殆今六年連兵不解已逾四稔雖本非獲已義在濟人而事有

勞良深罪己皆以朕之寡昧居安忘危致寇之繇竇在於此予則不德人亦何辜媿恨積哀痛心疾首昨者改元施令悔往布新將使反側獲安干戈自息猶懼思慮不周於庶務誠感未達於遐方一理矢中一夫不獲則何以謝天譴致人和俾代予言其在良弼宜令門下侍郎平章事蕭復充山南東西荆湖淮南江西鄂岳浙江東西福建嶺南等道宣慰安撫使嗚呼往率乃職敬敷朕命慰勉征戍勞來困窮訪其所安察其所弊滯淹必達寬濫必申無憚幽遠而不備無畧細微而不恤其諸道將士准前制嚴備疆界勿使侵

擾仍各令本御史具名銜聞奏悉與甄敘殊功勁節
 別條狀迹當特優獎百姓兩稅外徵率一切並停諸
 道事緣急切交須處分卽與長史商度務合便宜其
 餘利害並還日條奏朕當詳察以擇厥中宣布遠近
 咸令知悉

是月給事中杜黃裳兼御史中丞江淮宣慰使

十月辛丑詔工部尚書賈耽往河陽魏博道宣慰兵
 部侍郎李紆往河東宣慰

十一月丁丑以秘書監崔漢衡爲兵部尚書東都河
 陽魏博宋毫淄青賑給宣慰使工部侍郎劉太真爲

河東澤潞鎮冀易定賑給宣慰使

貞元元年二月遣工部尚書賈耽工部侍郎劉太直

宣慰於東都河南

是時東都米每斗值一千錢飢饉
 塞道前年蝗虫大起自山而東竟
 于海浮天被野草木無遺河北諸
 州米斗直錢九百錢死者壓道路

八年八月詔曰朕以薄德託於人上勵精庶政思致
 雍熙而誠不動天政或多闕陰氣作沴暴雨薦臻自
 江淮而及於荆襄歷陳宋而施於河朔其間郡邑連
 有水灾城郭多傷公私爲害損壞廬舍浸敗田苗或
 親戚漂淪或資產沉溺爲之父母所不忍聞興言疾
 疚良深惻憫夙夜祇畏悼于厥心是用寢不獲安食

而忘味時且賑恤庶洽幽明宜令中書舍人奚陟往江陵襄郢隨鄂申光蔡等州左庶子姚齊梧往陳許宋毫徐泗等州秘書少監雷咸往鎮冀德棣深趙等州京兆少尹韋武往楊楚廬壽徐潤蘇崑湖等州宣撫應諸州百姓因水不能自存者委宣撫使賑給死者各加賜物所在官爲歛收埋瘞其田苗所損委宣撫使與所在長吏具奏於戲一夫不獲一物失所刑法不中賦歛不均皆可以失陰陽之和致水旱之沴其繫囚及獄訟久未決者委所在長吏卽與踈辨務從寬簡俾伸寃滯貪官暴吏倚法害公特加懲肅用

明典憲災傷之後切在撫綏咨爾方鎮之臣洎于守宰咸宜悉乃心力以恤凶災宣布朕懷使各知悉是秋河南河北山南江淮凡四十餘州大水漂溺死者二萬餘人帝召見奚陟等於延英殿臨遣

憲宗以求貞元年八月卽位詔曰理天下者先脩其國國命之重寄在方鎮方鎮共理實惟列城列城爲政繫乎屬縣然則匹夫之耕匹婦之織積微成著以供國計永念蒸庶厥惟艱哉頃年以江淮租賦爰及權稅委在藩服使其平均太上皇君臨之勅務從省便遂令使府歸在中朝或恐巡院旣多職因交替新

制未立舊綱已紊况河汴而東瀕海之右各都輿壤
疆理接連如或征賦不均徵輸難濟物輕貨重法弊
人勞又聞江淮數道比愆時雨深憂黎庶之不足軍
國之闕供政有所不宣事有所未便牧宰有課績官
吏有否臧爰遣使臣申我休命宜令度支及諸道鹽
鐵轉運副使戶部侍郎兼御史大夫潘孟陽專往宣
諭慰安疲甿詢訪便宜蠲除疾苦安人利國稱朕意
焉

元和四年正月以灾旱命左司郎中鄭敬使淮南宣
歛吏部郎中崔芄使浙西浙東司封郎中孟簡使山

南東道荆南京兆少尹裴武使江西鄂岳等道宣撫

帝召對告之曰卿等賑恤灾旱當勤於奉職勿如潘孟陽所到務飲酒游山寺而已仍許卿等以便宜從事

穆宗長慶元年八月丁亥以殿中侍御史溫造為起
居舍人充鎮州四面諸軍宣慰使造前以京兆府司
錄宣慰兩河衆推其材故有是命遷起居舍人無何
范陽以其將朱克融為師鎮州殺節度使田弘正奏
呈又以造為鎮州四面河東魏博澤潞橫海深冀易
定等軍宣慰使

文宗太和三年正月癸丑諫議大夫柏耆以奉使召

命使二
對於延英

九月命監察御史孟瑄往淮南浙右巡察米價

五年七月甲申詔曰蓋天人之際相應如響祥祲之來各惟厥事乃者兵革始罷黎庶甫寧而蜀土載懼震驚方務綏輯今又水潦爲沴沉溺實多載省奏章益深惕慮諒以朕澤不逮下誠無感通五事致咎此方何罪夙夜兢兢憫歎良深宜令戶部郎中李踐方充兩川安撫使

開成元年二月庚寅中書門下奏准赦文諸道黜陟便以給事中盧均司農卿李玘吏部郎中薛廷光太

嘗少卿盧貞刑部郎中房直溫分命之

二年八月丁酉詔曰大河而南幅圓千里楚澤之北連亘數州近以水潦暴至隄防潰溢旣壞廬舍復損田苗言念黎元惟此災沴或生業蕩盡或農收索然困餒凋殘豈能自濟是用勤約疚于中懷今故臨遣使臣詳問病害紓其墊溺之苦申以勞來之方勉諭師徒安存孤老將我惠澤冀蘇疲人宜令給事中盧弘宣往許鄭滑鄆曹濮等道宣慰刑部郎中崔璿往山南等道鄂岳等道宣慰於戲朕自君臨勵求理道聳恐一物失所每以萬姓爲心誠無感通時有災害

夙夜媿悼不知所然宣示藩方喻茲詔命使寬其徭役禁其侵漁多方輯綏俾速完復布告昨庶知朕意焉

昭宗天復二年三月詔遣諫議大夫張顥示喻太原

汴州使息兵通和

太原後唐太祖也汴州梁太祖也

後唐明宗天福六年冬十月丁亥朔遣鴻臚少卿魏毗將作少監霍廷讓左領軍衛將軍安滲右驍衛將軍田峻于滑濮鄆澶四州簡河水害稼處并安撫百姓

周世宗顯德元年八月以滑州編戶皆以雨水害稼

上訴遣兵部郎中麻麟等二十三人分按之

册府元龜

淮南李嗣京叅闕

西極文翔鳳訂正

豫章黃國琦較釋

帝王部

一百六十三

招懷

傳曰招攜以禮懷遠以德賈誼所謂降者親酌而手
食之以懷其心乃五餌之一也蓋王者創業垂統握
契御辯征不諛討不庭推亡固存式遏亂畧必使威
加于外信著于內桀鰲革心英俊又用輔成大業光

昭帝圖如斯而已矣故其始也或喻之以文告或結之以要誓推心置腹曠然不疑分茅胙土待之不次以至賜田宅以安之錫臧獲以寵之其旨也

漢高祖五年十二月既平項籍齊王田橫懼誅與其徒屬五百餘人入海居嶋中海中山曰嶋帝聞之以橫兄

弟本定齊齊人賢者多附焉今在海中不收後恐有亂廼使使赦橫罪而召之橫謝曰臣烹陛下之使酈食其今聞其弟商為漢將而賢臣恐懼不敢奉詔請為庶人守海嶋中使還報帝廼詔衛尉酈商曰齊王橫即至人馬從者敢動搢者致族夷言平除其族廼復使

使持節具告以詔意曰橫來大者王少者乃侯耳大者

謂橫身少者其徒屬不來且發兵加誅橫廼與其客二人乘傳

詣維陽

十年九月代相國陳豨反帝東至邯鄲令周昌選趙

壯士可令將者白見四人白於天子而召見也帝嫚罵曰嫚者

也豎子能為將乎四人慙皆伏地帝封各千戶以為

將左右諫曰從入蜀漢伐楚賞未徧行今封此何功

帝曰非汝所知陳豨反趙代地皆豨有吾以羽檄徵

天下兵未有至者檄者以木簡為書長尺二寸用徵召也其有急事則加以鳥羽插之

示速疾也魏武奏事云今計唯獨邯鄲中兵耳吾何

愛四千戶不以慰趙子弟皆曰善

十一年五月詔曰粵人之俗好相攻擊前時秦徙中縣之民南方三郡使與百粵雜處會天下誅秦南海尉隨后南方長治之甚有文理中縣人以故不耗減粵人相攻擊之俗益止俱賴其力今立他為粵王使陸賈即授璽綬隨稽首稱臣

文帝元年以南粵王隨親屬在真定迺為置守邑親謂

父母也歲時奉祀召其從昆弟尊官厚賜寵之詔丞相

陳平舉可使粵者平言陸賈先帝時使粵帝召賈為

大中大夫謁者一人為副使賜隨書曰皇帝謹聞南

粵王甚苦心勞意朕高皇帝側室之子言非正嫡所生也棄

外奉北藩于代道里遼遠壅蔽樸愚未嘗致書言未得逆

使於高皇帝棄羣臣孝惠皇帝即世高后自臨事不

幸有疾日進不衰言疾病益甚也以故詩暴乎治詩乖也諸呂

為變故亂法不能獨制迺取他姓子為孝惠皇帝嗣

賴宗廟之靈功臣之力誅之已畢朕以王侯吏不釋

之故辭讓帝位不見置也不得不立今即位乃者聞王遣將軍

陸慮侯書求親昆弟請罷長沙兩將軍隨之昆弟在故鄉者求訪

之而兩將軍將兵繫城者請罷之以賓朕以王書罷

附於漢也言親昆弟者謂有服屬者也將軍博陽侯親昆弟在真定者已遣人存問修治先

人冢前日聞王發兵於邊為寇夷不止當其時長沙

言越兵寇邊長沙南郡皆厭苦

苦之南郡尤甚雖王之國庸獨利乎

之而漢軍亦當相拒方有戰鬪於越亦非利也必多殺士卒傷良將吏寡人

之妻孤人之子獨人父母得一亡十朕不忍為也朕

欲定地犬牙相入者以問吏吏曰高皇帝所以介長

沙土也介隔也朕不得擅變焉吏曰得王之

地不足以為大得王之財不足以為富服嶺以南王自治之

名也長沙南界也雖然王之號為帝兩帝竝立亡一乘之使

以通其道是爭而不讓仁者不為也願與王分棄前

患彼此共棄終今以來通使如故從今通使至於終

故使賈馳論告王朕意王亦受之毋為寇災矣上以縣裝衣曰

五十衣中褚三十衣下褚二十衣遣王謂上中下者

絲之多少薄厚之差也願王聽樂娛憂存問鄰國謂東越及陸

賈至南粵王恐乃頓首謝願奉明詔長為藩臣奉貢

職因使者獻白璧一雙翠鳥千犀角十紫具五百桂

蠹一器桂樹中蠹也漢書堂以獻陵廟載以赤穀小車此虫食桂故味辛而漬之以密食之也

生翠四十雙孔雀二雙

平帝元始二年募汝南南陽勇敢吏士三百人論說

江湖賊成重等二百餘人皆自出送家在所收事身

既自出又各送其家人重徙雲陽重成重也作賊賜

諸本屬縣邑從賊役耳重徙雲陽長師故徙之也

公田宅

後漢光武建元元年九月辛卯朱鮪舉城降初帝即
 位拜岑彭廷尉行大將軍事與大司馬吳漢大司空
 王梁建義大將軍朱祐右將軍侯進偏將軍馮異祭
 遵王霸等圖雒陽數月朱鮪等堅守不肯下帝以彭
 嘗為鮪較尉令往說之鮪在城上彭在城下相勞苦
 歡語如平生彭因曰彭往者得執鞭侍從蒙薦舉拔
 擢嘗思有以報恩今赤眉已得長安更始為王王所
 及皇帝受命平定燕趙盡有幽冀之地百姓歸心賢
 俊雲集親率大兵來攻雒陽天下之事逝其去矣公

雖嬰城固守將何待乎鮪曰大司徒被害時鮪與其

謀

與音預

又諫更始無遣蕭王北伐誠自知罪深彭還

具言於帝帝曰夫建大事者不忌小怨鮪今若降官

爵可保况誅罰乎河水在此吾不食言

指河以為信言其明白也

彭復往告鮪從城上下索曰必信可乘此上彭趣索

上鮪見其誠即許降後五日鮪將輕騎詣彭顧敕諸

部將曰堅守待我我若不還諸君徑將大兵上轅轅

歸鄧王乃面縛與彭俱詣河陽帝即解其縛召見之

復令彭夜送鮪歸城明日悉其眾出降拜鮪為平狄

將軍封扶溝侯

二年正月更始復漢將軍鄧畢輔漢將軍于康降皆復爵位

三年西州大將軍隗囂奉奏帝素聞其風聲報以殊

禮言稱字用敵國之儀所以慰藉之良厚慰安也藉薦也言安

慰而薦藉之良甚也初囂據涼州鄧禹承制遣使持節命囂為

西州大將軍得專制涼州朔方事及赤眉去長安欲

西上隗囂遣將軍楊廣迎擊破之又追敗之於烏氏

涇陽間躡既有功於漢又受鄧禹爵署其腹心議者

多勸通使京師躡乃上書詰闕時陳倉人呂鮪擁衆數萬與公孫述通寇三輔躡復遣兵佐征西大將軍

馮異擊之走鮪遣使上狀帝報以手書曰慕樂德義

思相結納昔文王三分猶服事殷但駑馬鈇刀不可

強扶數蒙伯樂一顧之價而蒼蠅之飛不過數步即

託驥尾得以絕羣隔於盜賊聲聞不數將軍操報款

誠扶傾救危南拒公孫之兵北御羌胡之亂是以馮

異西征得以數千百人躡躡三輔微將軍之助則咸

陽已為他人禽矣今關東寇賊往往屯聚志務廣遠

多所不暇未能觀兵成都與子陽角力臣欽若等曰子陽公孫述

也如令子陽到漢中三輔願因將軍兵馬鼓旗相當

曰生我者父母成我者鮑子自今以後手書相聞勿用傍人解構之言自是恩禮愈篤其後公孫述數出兵漢中遣使以大司空扶安王印綬授蹏蹏自以與述敵國耻為所臣乃斬其使出兵擊之連破述軍以故蜀兵不復北出是年劉永將慶吾斬永首降封吾為列侯帝又徵馮魴為虞令魴當王莽末四方潰畔聚賓客招豪傑作營塹以待所歸待真主也時天下未定而四方之士擁兵矯稱者甚衆唯魴自守兼有方略帝聞而嘉之徵請行在所見於雲臺拜官

五年四月河西大將軍竇融始遣使貢獻帝賜融璽

書黃金二百斤授涼州牧後融與五郡大守共砥厲

兵馬上疏請師期以討隗躡帝深嘉美之賜融外屬

圖及大史公五宗外戚世家

景帝子十三人為王而册五人同母者為一宗

故曰五宗言景帝以竇氏所生而致子孫衆多也

魏其侯列傳詔報曰每追

念外屬孝景皇帝出自竇氏定王景帝之手朕之所

祖昔魏其一言繼統以正長君少君遵奉師傅脩成

淑德施及子孫

施延也音羊跋切

此皇太后神靈上天祐漢

也從天水來者為將軍所讓隗躡書痛入骨髓叛臣

見之當股慄慙愧忠臣則酸鼻流涕義士則曠若發

矇非忠孝慤誠孰能如此豈其德薄者所能尅堪躡

自知失河西之助族禍將及欲設問離之說亂惑其
心轉相解構以成其姦又京師百僚不曉國家及將
軍本意多能採取虛偽誇誕妄談令忠孝失望傳言
乖實毀譽之來皆不徒然不可不思今關東盜賊已
定大兵今當悉西將軍其抗厲威武以應期會融被
詔卽與諸郡守將兵入金城後融歸朝拜冀州牧尋
遷大司空

十月好時候耿弇等擊破張步軍於臨淄步走還劇
帝勞軍至臨淄謂弇曰田橫烹酈生及田橫降高帝
詔衛尉不聽爲仇張步前亦殺伏隆 三年帝遣隆
論步步殺之若

步來歸命吾當詔大司徒 其怨 大司徒湛
卽隆文 步乃肉

袒負斧鑕於軍門封安兵侯

十二月西州大將軍隗囂遣長子恂入侍帝以爲胡

騎較尉封鐫羗侯 鐫謂
鐫鑿

六年帝與公孫述書曰圖讖言公孫卽宣帝也代漢
者當途高君豈高之身邪 一云光武與述書曰承赤
者書也姓當途其名高也

乃復以掌文爲瑞 時述妄引讖記乃刻
其掌文曰公孫帝也 王莽何足効

乎君非吾賊臣亂子倉卒時人皆欲爲君事耳何足
數也君日月已逝妻子少當早爲定計可以無憂天
下神器不可力爭宜留三思署曰公孫皇帝述不答

是年隗囂使周游詣關先到馮異營游為仇家所殺
帝遣衛尉姚期持珠寶繒帛賜囂期至鄭被盜鄭今華州

是縣亡失財物帝稱囂長者務欲招之聞而歎曰吾與

隗囂事欲不諧使來見殺得賜道亡帝復使來歙至

沂陽隗囂書曰昔柴將軍與韓信書云柴將軍柴武也韓信韓王

也信入匈奴武與韓書也陛下寬仁諸侯雖有亡叛而後歸輒復

信號不誅也以囂文吏曉義理故復賜書深言則似

不遜略言則事不決今若束手復遣恂弟歸闕庭者

則爵祿獲全有浩大之福矣浩亦大也吾年垂四十在兵

中十歲厭浮語虛辭即不欲勿報

七年以隗囂所署明威將軍王遵為大中大夫遵字

子春霸陵人雖與囂舉兵而嘗有歸漢意囂既稱臣

於公孫述帝因令來歙以書詔遵乃與家屬東詣京

師拜為大中大夫封尚義侯一云遵降封乙誰侯是冬盧芳臣

若等曰芳王莽末起兵為西平匈奴單于立為漢帝所置朔方太守田颯雲中

太守喬扈各舉郡降帝令領職如故

八年隗囂大將十三人眾十餘萬降囂奔西城帝復

詔告隗囂曰若束手自詣父子相見保無他也高皇

帝云橫來大者王小者侯若遂欲為黔布者亦自任

也

十二年公孫述弟恢及子壻史興並為大司馬吳漢
輔威將軍臧宮所破戰死自是將帥恐懼日夜離叛
述雖誅滅其家猶不能禁帝必欲降之乃下詔諭述
曰往年詔書比下開示恩信勿以來歛岑彭受害自
疑今以時自詣則家族完全若或不論委肉虎口痛
哉奈何將師疲倦吏士思歸不樂久相屯守詔書手
記不可數得朕不食言述終無降意
是歲盧芳將隨昱欲脅芳降芳知心營內潰遂亡入
匈奴其衆盡歸昱乃隨使者程恂詣闕叙昱為五原
太守封鐫胡侯昱弟慮武侯

十六年盧芳入居高柳縣名故城在定襄縣與閔堪兄林使使

請降乃封芳代王堪為代相林為代太傅賜繒二萬疋因使知和集匈奴

魏太祖為漢大將軍建安四年四月圍射於長楊故長史薛洪河內太守繆尚率衆降封為列侯

十一月張繡率衆降封為列侯
十二月袁術所署盧江太守劉勲率衆降封為列侯

八年十月袁尚將呂曠呂詳叛尚屯陽平率其衆降封為列侯是年吳以太史慈為建昌都尉沿海昏太祖具名遺慈書以篋封之發省無所道而

但貯當歸

十年正月袁熙大將焦觸張南等叛攻熙熙弟尚奔三郡烏丸觸等舉其縣降封為列侯

四月黑山賊張燕率其眾十餘萬降封為列侯

十三年七月太祖征劉表八月表卒其子琮嗣屯襄

陽大將蒯越從事中郎韓嵩東曹掾傅巽等說琮歸

太祖後太祖軍到襄陽琮舉州降太祖以琮為青州

刺史封列侯蒯越等侯者十五人越為光祿勳韓嵩

大鴻臚鄧羲侍中劉先尚書令其餘多至大官又以

表大將文聘為江夏太守使統本兵

十六年十月北征楊秋圍安定秋降復其爵位使留

撫其民人

二十年七月破漢中賊帥程銀侯選詣太祖降皆復

官爵銀選及李堪皆河東人興平之亂各有眾千餘

家並與馬超合超破走堪臨陣死銀選南入漢中至

是來降

十一月張魯自巴中將其餘眾降封魯及五子皆為

列侯

文帝初為魏王延康元年五月馮翊山賊鄭其王炤

率眾降皆封列侯

魏書曰初鄭其王炤及盧水胡率其屬來降王得降書以示朝日前

欲有令吾討鮮卑者吾不從而降又有欲使吾及今秋討盧水胡者吾不聽今又降昔魏武侯一謀而當

有自得之色見譏李悝吾今說此非自是也徒以為坐而降之其功大於動兵革也

七月蜀將孟達率眾降帝自筆手令曰吾前遣使宣國威靈而達郎來吾惟春秋褒儀父郎封并遣使還領新城太守近復有扶老携幼首向王化者吾聞夙沙之民自縛其君以歸神農豳國之眾襁負其子而入鄴鎬斯豈區略迫脅之所致哉乃風化動其情而仁義感其衷歡心內發使之然也以此而推西南將萬里無外權備將與誰守死乎臣欽若等曰權備謂吳蜀主也黃初三年八月蜀大將黃權及嶺南郡太守史邰等三百一十八人詣荊州刺史奉上所假印綬棨戟幢

麾牙門鼓車權等詣行在所在帝置酒設樂引見於承光殿權邰等人人前自陳帝為論說軍旅成敗去就之分諸將無不喜悅賜權金帛車馬衣裘帷帳妻妾下及偏裨皆有差拜權為侍中鎮南將軍封列侯即日詔使驂乘及封史邰等四十二人皆為列侯為將軍郎將者百餘人明帝大和二年蜀將諸葛亮寇邊帝幸長安露布天下并班告益州曰劉備背恩自竄巴蜀諸葛亮棄父母之國阿殘賊之黨神人被毒惡積身滅亮外慕立孤之名而內貪專擅之實劉升之兄弟空城而已亮

又悔易益土虐用其民是以利狼宕渠高定清羗莫不瓦解爲亮仇敵而亮反裘負薪裹盡毛殫剔趾適屢刻肌傷骨反更稱說自以爲能行兵於井底游步於牛蹄自朕卽位三邊無事猶哀憐天下數遭兵革且欲養四方之耆老長後生之孤幼先移風於禮樂次講武於農隙置亮度外未以爲虞而亮懷季熊愚勇之智不思荆邯度德之戒驅畧吏民盜利祁山王師方振膽破氣奪馬謖高祥望旗奔敗虎臣逐北蹈尸涉血亮也小子震驚朕師猛銳踴躍咸思長驅朕惟率土莫非王臣師之所處荆棘生焉不欲使十室

之邑忠信貞良與夫淫昏之黨同受塗炭故先開示以昭國誠勉思變化無滯亂邦巴蜀將吏士民諸爲亮所劫追公卿已下皆聽束手

是年魏興太守申儀來朝拜樓船將軍在禮請中初儀兄耽漢末在西平上庸間聚數千家後與張魯通又遣使詣太祖加其號爲將軍因使領上庸都尉至建安末爲蜀所攻以其郡西屬黃初中儀復來還詔卽以兄散號加儀因拜魏興太守封侯後與新城太守孟達不和數上言達有二心於蜀及達反儀絕蜀道使救不到達死後儀詣宛見司馬宣王勸使來朝

丹府元龜 卷之六十三

故有是命 一云儀仗在魏興專威疆場輒承制刻印多所假綬孟達既誅自有疑心時諸郡守以司馬宣王新克捷奉禮求賀皆聽之宣王使人諷儀儀至問承制狀執之歸于京師

青龍元年遼東太守公孫淵通於孫權國家知淵兩端而恐遼東吏民為淵所誤故公文下遼東因赦之日告遼東玄菟將較吏民逆賊孫權遭遇亂階因其先人劫掠州郡遂成羣凶自擅江表含垢藏疾冀其可化故割地王權使南面稱孤位以上將禮以九命權親又手北面稽顙假人臣之寵受人臣之榮未有如權者也狼子野心告令難移卒歸反覆肯思叛主滔天逆神乃敢僭號恃江湖之險阻王誅未加比年

已來復遠遣樓船越渡大海多持貨物誑誘邊民邊民無知與之交關長吏以下莫肯禁止至使周賀浮舟百艘沈滯津岸貿遷有無既不疑拒齎以名馬又使宿舒隨賀通好十室之邑猶有忠信陷君於惡春秋所書也今遼東玄菟奉事國朝紆青拖紫千百為數戴纒垂纓咸佩印綬曾無規正納善之言龜玉毀於匱虎兕出於匣是誰之過歟國朝為子大夫羞之昔狐突有言父教子貳何以事君策名委質貳乃辟也今乃阿順邪謀脅從姦惑豈獨父兄之教不詳子弟之舉習非而已哉若苗穢害田隨風烈火芝艾俱

焚安能自別乎且又此事固然易見不及鑒古成敗
書傳所載也江南海北有萬里之限遼東君臣無休
惕之患利則義所不利責則義所不貴此爲厭安樂
之居求危亡之禍賤忠貞之節重背叛之名蠻貊之
長猶知愛禮以此事人亦難爲顏且又宿舒無罪擠
使入吳奉不義之使始與家訣涕泣而行及至賀死
之日覆衆成山舒雖脫死魂魄離身何所逼迫乃至
於此今忠臣烈將咸忿遼東反覆攜貳皆欲乘桴浮
海期於肆志朕爲天下父母加念天下新定旣不欲
勞動干戈遠涉大川費役如彼又悼邊陲遺餘黎民

迷誤如此故遣郎中衛慎邵瑁等且先奉詔示意若
股肱忠良能效節立信以輔時君反邪就正以建大
功福莫大焉儻恐自嫌已爲惡逆所見染汚不敢倡
言永懷伊戚其諸與賊使交通皆赦除之與之更始
是歲公孫淵斬送孫權所遣使張灞許晏首帝於是
拜淵大司馬封樂浪公持節領郡如故

高貴鄉公甘露二年六月乙巳詔吳使持節都督夏
口將軍事鎮軍將軍沙羨侯孫壹賊之枝屬位爲上
將畏天知命深鑒禍福翻然與衆遠歸大國雖微子
去殷樂毅遁燕無以加之其以壹爲侍中車騎將軍

假節交州牧吳侯開府辟召儀同三司依古侯伯八命之禮袞冕赤舄事從豐厚

陳留王咸熙元年九月辛未詔曰吳賊政刑暴虐賦歛無極孫休遣使鄧句勅交趾太守鎖送其民發以爲兵吳將呂興因民心憤怒又承王師平定巴蜀卽糾合豪傑誅除句等驅逐太守長史撫和吏民以待國命九真日南郡聞興去逆卽順亦齊心響應興與協同興移書日南州郡開示大計兵臨合浦告以禍福遣都尉唐譜等詣進乘縣因南中都督護軍霍弋上表自陳又交趾將吏各上表言興創造事業大小

承命郡有山寇入連諸郡懼其計異各有攜貳權時之宜以興爲督交趾諸軍事上大將軍定安縣侯乞賜褒獎以慰邊荒乃心欵誠形於辭旨昔儀父朝魯春秋所美竇融歸漢待以殊禮今國威遠震撫懷六合方包舉殊裔混一四表興首向王化舉衆稽服萬里馳義請吏帥職宜加寵遇崇其爵位旣使興等懷忠感悅遠人聞之必皆蒞勸其以興爲使持節都督交州諸軍事南中大將軍封定安縣侯得以便宜從事先行後上策命未至興爲下人所殺

十月丁亥詔曰昔聖帝明主靜亂濟世保大定功文

武殊塗勲烈同歸是故或舞干戚以訓不庭或陳師旅以威暴慢至於愛民全國康惠庶類必先脩文教示之軌儀不得已然後用兵此盛德之所同也往者季漢分離九土顛覆劉備孫權乘間作禍三祖綏寧中夏口不暇給遂使遺寇僭逆歷世幸賴宗廟威靈宰輔忠武爰發四方拓定庸蜀役不浹時一征而克自頃江表衰弊刑政荒闇巴漢平定孤危無援交荆揚越靡然向風今交阯僞將呂興已帥三郡萬里歸命武陵邑侯相巖等糾合五縣請爲臣妾豫章廬陵山民舉衆叛吳以助北將軍爲號又孫休病死主帥

改易國內乖違人各有心僞將施績賊之名臣懷疑自猜深見忌惡衆叛親離莫有固志自古及今未有亡徵若此之甚若六軍震曜南臨江漢吳會之域必扶老携幼以迎王師必然之理也然興動大衆猶有勞費宜告諭威德開示仁信使知順附和同之利相國叅軍事徐紹水曹掾孫或昔在壽春並見虜獲紹本僞南陵督才質開壯或孫權支屬忠良見事其遣紹南還以或爲副宜揚國命告諭吳人諸所示語皆以事實若其覺悟不損征伐之計蓋廟勝長筭自古之道也其以紹兼散騎嘗侍加奉車都尉封都亭侯

或兼給事黃門侍郎賜爵關內侯紹等所賜妾及男女家人在此者悉聽自隨以明國恩不必使還以開廣大信

晉武帝泰始八年吳西陵督步闡來降拜衛將軍開府儀同三司封宜都公

咸寧二年六月吳京下督孫階帥衆來降以爲車騎將軍封丹陽侯

成帝時涼州牧張駿遣護羌叅軍陳寓從事徐虓華馭等至京師征西大將軍庾亮上疏曰陳寓等冒險遠至宜蒙銓叙詔除寓西平相虓等爲縣令

孝武帝時涼州牧張天錫旣降符堅後堅寇淮南大敗于淮肥時天錫爲符融征南司馬於陣歸國詔曰昔孟明不替終顯厥功豈以一眚而廢才用其以天錫爲散騎常侍左員外

後魏道武皇始二年二月幸陽城大破慕容寶衆寶所署尚書閔亮秘書監崔暹太常孫沂殿中侍御史孟輔等並降降者相屬賜拜職爵各有差初其將張驤李况慕容文等先來降尋皆亡還是日復獲之皆赦而不問

三月慕容寶走和龍寶燕郡太守高湖率戶三千歸

國帝賜爵東阿侯加右將軍總代東諸部
五月以中山城內爲慕容普隣所脅而大軍迫之欲
降無路乃密招諭之是歲寶鉅鹿太守高聳率郡降
賜爵經縣侯加龍驤將軍仍守鉅鹿以寶唐郡內史
遼東公子文括弟一客是時代人薛達顯自姚萇率
部落歸國帝嘉其忠欵賜爵聊城侯散員大夫待以
上客之禮達顯閑雅恭慎帝深器之

明元太寧二年八月宋滅姚泓渤海刁雍等歸國上
表陳誠於南境自效帝許之假雍建義將軍

十二月詔河東河內有姚泓子弟播越民間能有送

致京師者賞之

七年山陽公奚斤南討軍至潁川宋陳留太守嚴稜
率文武五百人詣斤降驛送稜朝帝於冀州嘉其誠
欵拜平遠將軍賜爵郟陽侯假荊州刺史隨駕南征
還爲上客是時赫連昌寧東將軍費峻率衆來降拜
龍驤將軍賜爵健爲公

大武神麴四年二月冠軍將軍安頡等平滑臺擒宋
將朱修之帝善其固守授以內職以宗室女妻之

延和元年七月代和龍馮跋石城太守李崇率十餘
郡歸降帝甚禮之呼曰李公以崇爲平西將軍北幽

州刺史固安侯

是年河西王秃髮儁檀子保周棄沮渠蒙遜來奔以保周爲張掖公

太延五年九月西征涼士乞伏西秦大夏鎮將嘗但子爽與兄仕國歸欵軍門帝嘉之賜仕國爵五品顯美男爽爲六品拜宣威將軍

太平真君元年八月沮渠無諱降尋拜爲征西六將軍涼州牧酒泉王

三年四月涼武昭王孫李寶據燉煌遣使內附十二月遣使授寶使持節侍中都督西垂諸軍事鎮西大

將軍開府儀同三司領護西戎較尉沙州牧燉煌仍鎮燉煌四品以下聽承制假授寶隴西狄道人伯父歆爲沮渠蒙遜所滅寶徙於姑臧歲餘隨舅唐契北奔伊吾臣於蠕蠕其遺民歸附者稍至二千寶傾身禮接甚得其心衆皆樂爲用每希報雪屬帝遣將討沮渠無諱於燉煌無諱捐城遁走寶自伊吾南歸燉煌遂修繕城府規復先業遣弟懷達奉表歸城帝嘉其忠欵故有是拜仍以懷達爲散騎常侍燉煌太守

十一年十一月南伐至鄒山太山鉅平人羊祉與魯

郡太守崔耶利及其屬縣徐遜愛猛之等俱降賜社
爵鉅平子拜鴈門太守是時合鄉令張忠歸降賜爵
新昌男拜新興太守高育爲馮文通建德令值太武
東封率其所部五百餘家歸命軍門帝授以建德將
軍齊郡建德二郡太守賜爵服如子

獻文卽位初遼東高崇歸國賜爵陽關男居遼東詔
以沮渠牧犍女賜潛爲妻封武威公主拜駙馬都尉
天安元年九月宋徐州刺史薛安都以彭城內屬宋
將張允沈攸之繫安都詔北部尚書尉元爲鎮戍大
將軍都督諸軍事孔伯恭爲副出東道救彭城時宋

明帝自立羣情不協共立前廢帝弟晉安王子勛安

都與沈文秀崔道固嘗珍奇等舉兵應之明帝遣將
張永等討安都安都遣使來降請兵救援帝召羣臣
議之羣官咸曰昔世祖嘗有弁儀隆之心

臣欽若等
曰世祖大

祖謚儀隆
宋文帝名故親御六軍遠臨江浦今江南阻亂內外

離心安都今者求降千載一會機事難遇時不可逢
取亂侮亡於是乎在帝納之安都又遣第四子道次
爲質弁與李敷等書絡繹相繼乃遣尉元等率騎一
萬赴之拜安都使持節散騎常侍都督徐南北兗州
青冀五州豫州之梁郟諸軍事鎮南大將軍徐州刺

史賜爵江東公勅安都之子散騎常侍駙馬都尉拔
詰彭城勞迎除拔冠軍將軍南豫州刺史

十一月宋兖州刺史畢衆敬遣使內屬

皇興元年閏正月宋青州刺史沈文秀冀州刺史崔
道固竝遣使請舉州內屬詔平都將軍長孫陵南平
將軍侯寤竒赴援之

二年二月鎮東大將軍尉元討徐州羣盜平之宋冠
軍將軍東徐州刺史張謹順於元元亦表授冠軍東
徐州刺史遣中書侍郎高閤與謹對爲刺史

是年薛安都與畢衆敬朝于京師見大禮重子姪羣

從竝處上客皆封侯至于門生無不收敘焉又爲起
第宅館宇崇麗資給甚厚安都從祖弟真度初與安
都南奔及安都爲徐州真度爲長史頗有勇幹爲其
爪牙從安都來降爲上客衆敬弟衆愛隨兄歸國以
勲爲第一客賜鉅平侯衆敬子元賓爵須昌侯加平
遠將軍是時清河司馬房法壽與弟從并州刺史崇
吉及冀州刺史崔道固兖州刺史劉休賓俱至京師
以法壽爲上客崇吉爲次客崔劉爲下客法壽供給
亞於薛安都等以功賜爵莊武侯加平遠將軍給以
田宅奴婢

孝文泰和十七年齊尚書左僕射王奐子肅以其父及兄弟俱爲齊武所殺乃自建業來奔帝虛襟待之除輔國將軍長史賜爵關陽伯肅固辭伯爵許之十八年十月詔曰比聞綠邊之蠻多有竊掠致有父子乖離室家分絕旣虧和氣有傷仁厚朕渾一區宇子育萬姓若苟如此南人豈知朝德哉可詔荆郢東三州勒勅蠻民勿有侵暴

十九年二月車駕至鍾離軍士擒齊卒三千帝曰在君爲君其民何罪於是免歸是年拜光城蠻酋田益員外散騎嘗侍都督光城弋陽汝南新蔡永安五郡諸軍事冠軍將軍南司州刺史光城縣開國伯食蠻邑一千戶以益宗十七年自齊歸欵故也

二十二年南討旣克宛外城命舍人公孫延景宣詔於南陽太守房伯玉曰天無二日土無兩主是以躬總六師蕩一四海宛城小戎豈足以慰抗王威深可三思封侯胙土事在俯仰伯玉對曰外臣最荷國恩奈任疆境爲臣之道未敢聽命伏惟遊蠻遠涉願不損神又遣謂曰朕親率麾旆遠涉清江此之小戎豈足徘徊王師但戎路所經纖介須殄宜量力三思自求多福且蒙蕭願殊嘗之眷魯不懷恩報以塵露蕭

鸞妄言入繼道成願子了無子遺卿不能建忠烈於君親返立節於逆豎卿之罪一又頃年傷我偏師卿之罪二今蠻旆親戎清一南服不先面縛待罪麾下卿之罪三卿之此戍多則一年中則百日少則二旬尅殄豈遠宜善思之後悔無及伯玉對曰昔蒙武帝愷悌之恩忝侍左右此之厚遇無忘夙夜但繼主失德民望有歸主上龍鳳踐極光紹太宗非直副億兆之深望實兼武皇之遺勅是以勤懃懇懇不敢失墜往者北師深入寇擾邊民輒厲將士以救蒼生此乃邊戎嘗事陛下不得垂責及克宛伯玉面縛而降帝

引見伯玉弁其參佐二百人特宥之時伯玉從祖弟三益南陽內附孝文與語善之曰三益二益殊不惡拜員外散騎侍郎

冊府元龜 招懷一

冊府元龜

冊府元龜

淮南李嗣京參閱

西極文翔鳳訂正

豫章黃國琦較釋

帝王部 一百六十四

招懷第二

後魏宣武景明元年正月齊豫州刺史裴叔業遣子芬之及兄女夫韋伯昕奉表以壽春內附驃騎大將軍彭城王勰車騎將軍王肅率部騎十萬赴之詔曰叔業明敏秀發英穎早悟馳表送誠忠高振古宜加

褒授以彰先覺可使持節散騎嘗侍都督豫州雍允
 徐司五州諸軍事征南將軍豫州刺史封蘭陵郡開
 國公食邑三千戶又賜叔業璽書曰前後使反有勅
 想卿其一二寶卷昏枉日月滋甚虐徧宰輔暴加威
 屬淫刑既逞朝無子遺國有瓦解之形家無自安之
 計卿兼茲智勇深嘉乃勲前即勅豫州緣邊諸鎮兵
 馬行往赴援揚大眼奚康王鐵騎五千里言即路彭
 城王颯尚令肅精卒千萬駱驛繼發將以長驅淮海
 電擊衡巫卿其并心戮力同斯大舉殊勲茂績職爾
 之內崇名厚秩非卿孰賞并有勅與州佐使及彼土

人士其有微功片効必加褒異軍未渡淮叔業病卒
 芬之以父勲授通直散騎嘗侍上蔡縣開國伯食邑
 七百戶叔業爪牙心膂所寄者裴智并授中郎將封
 浚儀縣王昊左軍將軍封汝陰縣趙華左中郎將封
 西宋縣叔業姻婭柳玄達輔國將軍封南頓縣女夫
 韋伯昕封雲陵縣並開國男食邑二百戶玄達頗涉
經史初仕
 齊歷諸王參軍叔業之鎮壽春委以管記及叔業之
 被猜疑將謀獻款玄達贊成其計前後表啓皆玄達
 之辭伯昕叔業以其有大李道真右軍將軍陽縣開
志故遣送子芬之為質
 國子食邑五百戶故文盛右軍將軍封剛陵縣魏承
 祖右軍將軍封平春縣並開國子各食邑三百戶以

叔業司馬帶汝陰太守李元護爲輔國將軍齊州刺史廣饒縣伯食邑一千戶便道赴職初叔業歸順元護贊同其謀及叔業疾病外內阻貳元護督率上下以俟援軍壽春尅定元護頗有力焉又以陳郡太守尹挺爲輔國將軍南司州刺史譙郡太守楊令空爲輔國將軍南兗州刺史皆以叅叔業歸誠之謀也

三年三月南齊鄱陽王蕭寶寅以梁高祖旣克建業殺其兄弟將害寶寅來奔壽春四月以寶寅爲鎮東將軍東陽州刺史封齊王閏四月詔曰寶寅深識機運歸誠有道冒險履屯投命降闕微子陳韓亦曷以過也可遣羽林監領主書劉桃符詣彼迎接其資生所須之物及衣冠車馬在京邸館付尚書悉令豫備及至京師帝禮之甚重

正始元年詔中山王英所執梁冠軍將軍監司州事蔡靈恩等隨才擢敘

永平元年八月冀州京兆王愉反詔赦冀州民雜工役爲元愉所誣者其能斬護逆黨別加優賞

孝明孝昌元年齊東昏侯寶卷子贊來奔先是梁武滅寶卷寶卷宮人吳氏始孕匿而不言梁武納之生贊以爲己子封豫章王及長其母告之以實贊嘗有

來奔之意後爲南兗徐二州刺史會帝遣臨淮王彧
討之贊密告誠款夜投彧軍至是屈于雒陽陞見之
後就館舉哀追服三載贊叔父寶寅時在關西遣使
觀察聞其形貌歛眉悲感朝廷賞賜豐渥禮遇隆厚
授司空封高平郡開國公丹陽王食邑七千戶是年
北鎮降民二千餘萬詔給事黃門侍郎楊昱爲使分
散於冀定瀛三州就食

三年邢杲反於青光之間杲光祿大夫蘭根之甥詔
蘭根銜命慰勞

孝莊永安中宋廬江太守劉宗之子藻與姊夫李崱

俱來歸賜爵易陽子

後廢帝中興二年韓樓反於幽州樓將王懷知其無
成陰結所親叛樓歸國拜征虜將軍第一領民酋長
武周縣侯是時樓將薛孤延與懷等密計討樓爲樓
別帥乙弗醜所覺力戰破醜遂相率歸行臺劉貴表
爲都督加征虜將軍賜爵永固縣侯

出帝永熙三年二月梁假節豫州刺史南香三毛香
舉城內附授以持節安南將軍信州刺史義昌王
西魏恭帝三年梁將王琳遣使來附以琳爲大將軍
後周太祖爲西魏丞相敗齊神武于沙苑東魏河北

郡守裴杲率其宗黨歸闕帝嘉之賜田宅奴婢牛馬什物等

叱列伏龜仕東魏為大都督沙苑之敗隨例來降太祖以其豪門解縛禮之仍以邵惠公女妻之

史寧仕東魏為涼其瓜三州諸軍事遣使詣太祖請事太祖即以所服冠履衣被及弓箭甲刃等賜寧謂其使人曰為我謝涼州孤解衣以衣公推心以委公

公其善始令終立功名也

賀若統初為東魏潁州長史大統二年執刺史田迅以州降至長安大祖謂統曰卿以潁州從我何日能

忘即拜右衛將軍散騎常侍兗州刺史

高賓初仕東魏為立義都督同列有忌其能者譖之於齊神武賓懼及於難太統六年乃棄家屬間行歸

闕太祖嘉之授安東將軍

楊乾運仕梁為車騎將軍鎮潼州令其兄子略將二千人鎮劔閣又遣其塔樂廣鎮安州仍誠略等曰吾

欲歸附關中但未有繇耳若有使來即宜盡禮迎接會大祖令乾運孫法維及使人牛伯友等至略即夜

送之乾運遂令人李若等入關送款太祖乃密賜乾運鐵券授持節驃騎大將軍開府儀同三司侍中

梁州刺史安康郡公

扶猛上甲黃土人初仕梁爲南維北司二州刺史封宕渠縣男及侯景作亂猛乃擁衆自守未有所從大統十七年大將軍王雄定魏興猛率其衆據險爲堡壁特遣使微通饋餉而已魏廢帝元年魏興叛雄復率師進討猛勒兵拒戰雄擊破之猛遂以衆降太祖以其世據本鄉乃厚加撫納授車騎大將軍儀同三司加散騎常侍復爵宕渠縣男割二郡爲羅州以猛爲刺史

任果南安人梁沙州刺史褒之子世爲方隅豪族果性勇決志在立功魏廢帝元年率諸部來附太祖嘉其遠至待以優禮果因面陳取蜀之策太祖深納之乃授使持節車騎大將軍儀同三司大都督散騎常侍沙州刺史後爲始州刺史在任未久果請入謁太祖許之以其方隅首望早立忠節乃進爵樂安郡公席固襄陽人初仕梁爲興州刺史以地來附時太祖方欲南取江陵西定蜀漢固之至甚禮遇之乃遣使就拜使持節驃騎大將軍儀同三司大都督侍中豐州刺史封新豐縣公邑二千戶後轉湘州刺史固以未經朝謁遂蒙榮授心不自安啓求入覲太祖許

之及固至太祖與歡燕賞賜甚厚進爵靜安郡公增邑并前三千三百戶

蕭圓肅梁武陵王紀之子紀建號圓肅守蜀太祖師至遂降封戟城郡公又以圓肅有歸欵之勲別賜食思君縣五百戶收其租稅

明帝武成初南齊北豫州刺史司馬蕭雄舉州來附帝遣柱國高陽公達奚武與大軍楊忠率衆迎之

武帝保定三年詔曰梁汝南王蕭大封晉熙王蕭大圓等梁國子孫宜加優禮式分茅土實允舊章大封可封晉陵縣公大圓可封始寧縣公邑一千戶又加

大圓騎大將軍儀同三司并賜田宅奴婢牛馬粟

大封大圓梁簡文子以魏恭帝三年歸太祖至是封焉

建德五年十二月帝伐齊丁巳次并州齊主高緯留從兄延宗等守并州輕騎走鄴是日詔齊王公以下曰夫樹之以君司牧黔首蓋以除其苛慝恤其患害朕君臨萬國志清四海思濟一世之人寘之仁壽之域嗟彼齊趙獨爲匪民乃瞻東顧載深長想僞主涼德早聞醜聲夙著酒色是耽盤游是悅闔豎居阿衡之任胡人寄唇舌之重棟梁骨鯁翦爲仇讎狐趙餘緒降爲阜隸民不見德唯虐是聞朕懷茲漏網置之

度外正欲各靜封疆共紓民厲故也爾之主相曾不
是思欲構厲階反貽其梗我之率土咸未剗刃帷幄
獻兼弱之謀瓜牙奮干戈之勇竊糧坐甲若赴私讎
是以一鼓而定晉川再舉而摧逋醜僞丞相高阿那
瓌驅逼餘燼竊據高壁僞定南王韓建業作守介休
規相抗擬聊示兵威應時奔潰那瓌則單馬霄遁建
業則面縛軍和爾之逃卒所知見也若其懷遠以德
則爾難以德綏處隣以義則爾難以義服且天與不
取道家所忌攻昧侮亡兵之上術朕今親馭羣雄長
驅宇內六軍舒旆萬隊啓行勢與雷電爭威氣逐風

雲齊舉王師所次已達近郊望歲之民室家相慶來
蘇之后思副厥成僞主若妙盡人謀深達天命牽牛
道左銜璧轅門當惠以焚櫬之恩待以列侯之禮僞
將相王公已下衣冠士民之族如有深知事宜建功
立効官榮爵賞各有加隆若下愚不移守迷莫改則
委之執憲以正刑書嗟爾庶士胡寧自棄或我之將
卒逃彼逆胡無問貴賤皆從蕩滌善求多福無貽後
悔璽書所至咸使知聞自是齊之將帥降者相繼封
其特進開府賀拔伏恩爲郡國公其餘官爵各有差
又詔高緯及王公以下若釋然歸順咸許自新諸士

入偽朝亦從寬宥官榮次序依例無失其齊制偽令
卽宜削除鄒魯縉紳幽并騎士一介可稱並宜銓錄
百年去殺雖或難希朞月有成庶幾可勉

六年正月齊平

陸玄齊大司空騰之子仕齊爲奉朝請歷成平縣令
齊平武帝見玄特加勞勉卽拜地官府都上士

隋高祖初爲周相後梁蕭歸令鴻臚卿柳莊奉書入
關時三方構難高祖懼歸有異志及莊還謂莊曰孤
昔以開府從役江陵深蒙梁王殊眷今主幼時艱猥
蒙顧託中夜自省實懷慙懼梁主奕葉重光委誠朝
廷而今已後方見松筠之節君還本國幸申孤此意

于梁主也遂執莊手而別時梁之將軍咸潛請與師
與尉廻等爲連衡之勢進可以盡節於周氏退可以
席卷山南唯歸疑爲不可會莊至自長安具申高祖
結託之意歸深以爲然衆議遂止

唐高祖初爲唐公舉義兵於太原五原太守張長遜
遣使歸附帝甚嘉之授光祿大夫封安化郡公及至
河東縣賊帥孫華謁帝於汾陽具舟楫以待義師拜
華爲光祿大夫前軍總管旣入關鄭縣令段確以縣
來降拜御史大夫渭北賊帥李仲文遣使歸附拜上
柱國襲父真爵爲普寧鄉公弘農賊帥張士貴以所

統精兵及戶口簿帳遣使送款拜右光祿大夫
義寧元年十二月河北郡守蕭瑀與梁泉令豆盧寬
率郡內文武官歸國授瑀光祿大夫上柱國封宋國
公食邑三千戶加寬銀青光祿大夫仍遣河池撫慰
二年四月賊帥王君廓以衆歸國拜上柱國假河內
太守封崋山郡公食邑二千戶尋轉遼州刺史封上
谷郡王

六月隋安陽令呂珉以相州來降拜相州刺史

七月榆林賊帥郭子和遣使來降拜爲靈州總管

八月涼州賊帥李軌遣使來請降以軌爲涼州總管

封涼王

十月李密爲王世充所敗率衆二萬來降高祖禮之
聳呼爲弟拜爲光祿卿上柱國封邢國公

十一月隋東郡丞王軌以滑州來降拜滑州總管

十二月隋襄平太守鄧暉以柳城北平二郡來降以

暉爲營州總管

武德二年閏二月辛丑可達寒賊朱粲遣使請降命
前御史大夫段確使於粲

王世充將李公逸來降拜上柱國杞州總管陽夏郡
公邑二千戶公逸黃人也隋末喪亂與其族弟善行

客居雍丘以義勇為人所附初歸王世充知其必敗遂間遣使請降遂有是命因以雍丘置杞州

七月海岱賊帥徐圓郎以數州之地遣使請降即授兗州總管是月王世充遣其將羅士信侵穀州士信率其眾千餘人來降世充遣步騎五千躡之不及帝素聞其勇及是大悅遣使迎勞賜物五千段廩食音上

稟下音嗣其所部焉

九月王世充將張鎮州侵南陽帝遣使者諭之仍拜鎮州為右武侯大將軍是月以和州賊杜伏威為淮南道安撫大使和州總管伏威大業末越王侗以為

東道大總管封楚王太宗之圍王世充遣使詔之伏威請降故有是拜

三年正月黎州總管李世勣於寶建德中自拔來歸帝大喜遣使迎勞之詔授黎州總管上柱國萊國公尋加右武侯大將軍改封曹國公勣本姓徐賜姓李氏賜良田五十頃甲第一區

三月以石州賊帥劉季真為石州總管賜姓李氏封彭山郡王

四月戊午太宗討劉武周于栢壁其將尉遲敬德與宋金剛來拒王師敬德屯介休帝擊金剛大破之追

奔至於介休乃遣宇文士及任城王道宗等往諭敬德遂舉城來降太宗大悅賜以曲宴授秦府統軍六月以和州總管淮南道安撫大使杜伏威爲總管江淮以南州諸軍事揚州刺史東南道行臺上書令上柱國封吳王食邑五百戶賜姓李氏附屬籍七月王世充右建威將軍田世開來降帝嘉之待遇甚厚

九月甲午王世充將張鎮州來降拜左衛將軍封黃國公食邑三千戶

戊申高開道遣使來降乃下詔曰褒德敘功有國爰訓任賢賞善列代通規僞燕王高開道家本海隅志懷慷慨有隋之末州域彫殘招集徒旅自保邊塞繕脩斥候捍禦寇戎民吏肅清倉庫完實旣而審達機變遠慕朝風闔境獻誠歸款內屬清中經略輯寧燕代厥功以茂宜從褒寵禮命之善用超羣級可使持節蔚州諸軍事蔚州總管加授上柱國賜姓李氏上籍宗正封北平郡王食邑五千戶是月王世充豫州豪右楊仲達以三州之地來降拜仲達爲上柱國賜食邑三千戶其子行規爲豫州總管行模爲息州刺史

史

四年正月竇建德行臺尚書令胡大恩以大安鎮來降詔曰疇庸旌善哲王彞訓任賢使能有國通典胡大恩往因隋季夷狄交侵繕甲聚徒輯寧邊境既而阻隔戎寇自保方隅遠慕朝風因機立效摧破凶黨亭徼無虞抗疏闕庭以申誠節忠義克舉宜隆寵命因其所統即加榮秩可使持節代州諸軍事代州總管加授上柱國封定襄郡王食邑五千戶賜姓李氏上屬籍宗正

封譙郡公

初法明依李密密敗歸是來降

五月周法明以斬春等四郡之地歸國拜黃州刺史

是月竇建德所署右僕射裴矩將建德之妻及傅國大墜來降封矩安邑縣公

六月海州賊臧君相以五州來降拜海州總管

八月詔曰三楚之地江山遐阻五嶺之表經塗遼曼自有隋失馭盜賊交侵聲教莫通方隅隔絕朕受圖膺運君臨區宇率土之濱情均撫字方今函夏寧乂文軌大同尉侯無虞要荒率職然而江蠡之派咸阻寇戎閩寓之鄉未聞正朔左武侯將軍黃國公張鎮州大將軍合浦縣公張知略二方首族早從歷任思展誠效輯寧州里鎮州可淮南道行軍總管智略可

嶺南道行軍總管以安撫之

九月甲子僞吳王汪華以黟歙五州之地來降華隋大盜汪寶權之族子也大業末爲山賊有兵一萬至是拜歙州總管封越國公丁卯文登賊帥淳于難率衆來降以其地爲登州拜難爲登州刺史上柱國封萊國公食邑三百戶

十二月遣安撫大使李靖徇嶺南諸州皆下之詔襄州道行臺兵部尚書劉瞻緩集嶺南

五年二月江南賊帥張善安以虔吉等五州之地來降拜洪州總管邳國公

四月隋鴻臚卿竇長真以寧越鬱林之地來降以長真爲總管長真世爲渠帥其父猛力陳末爲大守陳七猛力自云與叔寶同日生當爲天子不肯入朝隋師討之阻瘴不能尅猛力卒以長真爲刺史隋師之討林邑也長真攻畢役諸部落得數千人從征遼左煬帝嘉之拜鴻臚卿大業十年遣還嶺表爲安撫大使遇隋亡以其地歸於蕭銑帥五越之衆攻丘和於交趾至是來降交愛之道自此始通也

五月隋日南太守李暎遣使請降以暎爲南德州總

管

是年七月丁酉隋漢陽太守馮盎以越南之衆來降
 高祖以其地爲高羅等八州仍授盎高州總管累封
 國公拜其子智載春州刺史智彘東合州刺史尋徙
 封盎耿國公盎比燕人也初馮弘投高麗也遣其子
 業以三百人浮海歸宋遇弘爲魏所滅業留居番禺
 之新會其孫融梁初仕羅州刺史其子寶娶越女沈
 氏爲妻因爲南越首領自融至盎代爲牧守隋末高
 涼通守沈寶輒反盎擊破之因比吞廣州西并蒼梧
 南牧朱崖之地自稱總管至是來降嶺表悉定矣
 郭孝恪隋末率鄉曲數百人附於李密因與李勣守

黎陽密敗勣令孝恪入朝送款高祖授上柱國封陽
 翟郡公宋州刺史令與李勣經營武牢巴東新德州
 將委以選補

丘和隋大業末爲交趾太守隋滅遂以州從蕭銑及
 銑平和以海南之地歸國詔使李道裕卽授上柱國
 譚國公交州總管和遣司馬高士廉奉表請入朝詔
 許之

楊恭仁大業末爲宇文化及所署吏部尚書隨至河
 北爲化及守魏縣時元寶藏據有魏郡會行人魏徵
 說下寶藏執恭仁送于京師高祖甚禮遇之拜黃門

州元龜 招懷二
侍郎封觀國公

李襲志隋末封始安郡公守本郡經二年而無援卒
爲蕭銑所陷銑署爲工部尚書簡較桂州總管武德
初高祖遣其子玄嗣齋書召之襲志乃密說嶺南首
領隨永平郡守李光度與之歸國高祖又命間使齋
書諭襲志曰卿昔迹久在桂州仍屬隋室運終四方
圯絕率衆保境未知所統朕撫臨天下志在綏育眷
彼幽遐思沾聲教况卿朕之宗姓情異於嘗一家弟
姪竝立誠效公又分遣首領申諭諸州情深奉國甚
副所望卿之子弟竝據州縣俱展誠績每所嘉歎不

能已已今竝入屬籍著于宗正

張長遜仕隋爲五原太守天下大亂遂附於突厥與
莫賀咄設結爲兄弟以自固突厥號長遜爲割利特
勤及義兵起遣使歸附高祖甚嘉之授左光祿大夫
封安化郡公

李藝隋末爲幽州總管聞高祖踐祚藝謂官屬曰建
德開道皆劇賊耳宇文化及殺逆無道吾皆不能從
之唐公起兵事符衆望入據關右自古必成吾率衆
歸之意已決矣會唐使張何傳檄至劉藝奉表歸國
於是璽書封王賜姓李氏

席辯字令言隋末寓居東郡及王世充僭號署辯爲左龍驤將軍辯私謂僞將楊虔安李君義等曰充雖據有雒陽無人君之量大唐已定關中卽真主也乃共虔安君義等遣使入京密申忠款高祖欲發兵攻雒陽潛令以書召辯辯奉書卽帥部兵入京李育德趙郡人也祖諤隋通州刺史寓居武陟隋末亂乃繕脩器械嬰古城以自保遠近多附之王德仁等攻之皆不能克后聞隋滅與河內郡椽柳燮河陽都尉獨孤武都同降李密以育德爲總管及密爲世充所破育德以城歸國拜陟刺史

盧祖尚少以俠氣聞爲州里所歸屬宇文化及之亂遂舉兵據郡國自稱刺史尋附東都越王侗署爲光州總管沈國公后遇世充篡位遂與之絕遣使歸國因復其本任封弋陽郡公

田留安初爲王世充征南將軍大被恩遇然陰謂所親曰吾嘗聞李氏當王天下今長安威德日隆天人所尚吾知歸矣遂率所部二千人來降高祖大悅拜上柱國雲麾將軍封懷化郡公賜物七百段太宗在藩引爲右四統軍從擊宋金剛徐圓郎皆有戰功太宗貞觀元年五月乙丑嘗安賊帥范君璋以衆來

隆拜隰州都督君璋初爲劉武周腹心武周又歸突利可汗后見頡利政亂灾異屢起知其必敗乃率所部來降頡利遣兵追躡逆擊走之至太州遣子孝政先入朝以是拜爲都督封國公邑三千戶賜帛四十疋

十月以嶺南首領馮盎談殿等尚阻兵更相侵掠時議者多請發兵擊之帝不許因遣員外散騎侍郎李公掩持節宣諭之使者所至之處溪洞酋領皆來聽命南方悉定盎遣子智載奉表入朝帝嘉其誠欵賞賜累至拜衛尉少卿

九年十二月吐谷渾王慕容順爲其下所殺國中大亂乃下詔曰近以吐谷渾恃其遐阻屢擾疆場肆行凶虐種類乖離爰命將士申茲弔伐有征無戰所向摧殄渠魁竄迹自貽滅亡朝威遠暢邊庭靜謐朕君臨寰宇志在含弘不欲因彼危亂絕其宗祀乃立僞主之子大寧王慕容順撫招余燼守其舊業而順曾不感恩遽懷二志種落之內人畜怨憤遂創大義即加勦絕雖復權立其子所部又致擾亂競動干戈各行所欲朕憂勞兆庶無隔夷夏迺瞻西顧良用矜愴若不星言拯救便恐塗炭未已兵部尚書潞國公侯

君集等咸才兼文武寄深內外嘉謀著於廟堂茂績書於王府必能宣風闡外克定遐方可量其事機綏撫經略分遣使人明加曉諭如有不遵明旨敢興異志卽合精銳隨便剪撲盡威懷之道稱朕意焉

十六年正月乙丑遣使往西州撫慰其舊首望有景行淳直者量擬騎都尉以下官奏聞百姓疾患賜醫藥老病憫獨糧食乏絕者咸加賑給

十九年六月伐遼東命諸將攻白崑城臨其西北城王孫佻音請降遂受降帝以白崑城爲崑州以孫佻音爲中大夫守崑州刺史上輕車都尉賜帛一百疋

馬一匹衣襲金帶一同謀而降者並賜戎秩及諸衣物焉

肅宗至德元年七月甲子卽位於靈武赦書應逆賊李林甫王鉞楊國忠近親合累者不在免限百姓官吏能率親屬去逆歸順有官加其優獎斬得逆賊父子不問首從當錫茅土別有褒崇

二年十二月安祿山僞范陽節度使史思明遣使以兵八萬上表來降嘉之授御史大夫兼范陽節度使令便統所部以討殘寇

三年正月庚子滄州刺史烏知洽延王傳樊澄竝背

逆歸順知洽爲維州刺史澄爲涼王傳二月癸卯僞
潘青節度大嘗卿兼御史大夫能元皓及子僞太子
家令昱皆逆歸順有詔加其忠義以元皓爲銀青光
祿大夫鴻臚卿攝御史大夫充河北招討使子昱朝
散大夫守太僕少卿

乾元元年三月丁巳逆賊軍將幽州節度副使特進
獻誠王阿史那承慶特進左威衛大將軍安守忠左
羽林大將軍順化王阿史那從禮蔡希德李庭訓符
敬等使人齎表狀歸順詔曰承慶可大保封定襄王
守忠可左羽林大將軍封歸德郡王從禮可太傅封

歸義郡王希德可德州刺史庭訓可邢州刺史敬可

維州刺史

十月甲辰帝御宣政殿册成王爲皇太子詔大赦天
下令餘寇未殄有脅在賊中未歸順者一切不以爲
罪其受賊節制能以兵降者酬其封爵

二年五月丁卯河北破賊生擒賊八人來獻帝並釋
之各賜乾元錢十千文及器仗一副馬一匹絹一束
並放歸賊中勅之曰任汝所適八人皆刺臂爲盟約
誓梟賊首以報聖恩

九月史思明寇陷維陽叔冀守汴州戰不勝與董秦

降思明十一月甲子以開府儀同三司兼殿中監董秦封隴西郡開國公食邑三千戶仍賜姓李氏改名忠臣爲秦陷賊歸順故寵之也

十月賊將高庭暉投降自五臺府果毅拜特進兼右武衛大將軍李日越投降授特進兼右金吾衛大將軍員外置同正

上元二年正月詔曰比緣寇盜之內干戈脅從白刃臨頸胡寧忍決所以陷於兇黨苟免者多前後詔書頗已該及其史思明將士及僞署官屬等有束身歸順并率衆來降官爵如初一無所問以城邑降者仍

別加封爵餘兇黨之流亦同此例天寶臨炤朕無食

言

五月甲午逆賊史朝義下僞滑州刺史兼鄭汴等節度使令狐彰斬逆賊大將軍二人并破杏園渡口賊二千餘衆以滑州歸順帝嘉之拜滑州刺史攝御史中丞充滑邢德貝相魏六州節度使仍加銀青光祿大夫

九月壬寅赦書其史朝義若能翻然改圖背逆歸順罪無所問加以勳封

元年建丑月賊中官游少連蘇茂珍等歸降以少連

為驃騎大將軍兼少府監員外置同正員仍封臨維
縣公茂珍為左金吾大將軍員外置同正員仍封扶
風縣王
代宗寶應元年八月劔南狂賊徐知道麾下將李忠
勇殺知道以降劔南州縣盡平帝以忠勇為蜀州刺
史封臨晉郡王賞功也

十月東都平史朝義逃奔汴州賊將張獻誠不納舉
所統兵歸國詔拜汴州刺史充汴宋節度

十一月元帥雍王上言偽鎮州節度使張忠至以趙
定深鎮易五州歸順拜忠志簡較禮部尚書兼常州

刺史元武德軍節度使賜姓李名寶臣

廣德二年二月南郊大赦天下所有諸色結聚及羗
渾黨項等能悔過自陳各歸生業一切並釋其罪其
中有能率先來者仍特加官賞

六月癸未詔曰佐命大臣自天所授納于將相委以
腹心休戚實同始終無易大保兼中書令靈州大都
督府長史單于鎮北副大都護充朔方節度關內支
度營田鹽池押諸蕃部落副大使知節度事六城水
運使兼河中副元帥上柱國大寧郡王懷恩朕之元
輔上帝賚予道備五才能包三傑長策制敵精誠感

神夙奉先朝志平多難援旗朔野扈蹕岐山前驅啟
行所指皆克收關河之襟帶復都邑之衣冠以義斷
恩毀家徇國躬擐甲冑驅馳十年遇戰則酣逢堅必
脆總統戎旅通和夷狄決策東向殲厥渠魁掃清妖
氛芟薶逋梗海隅萬里一舉蕩平遂欲息馬投戈坐
而論道當朝大政竝以咨之聽賡載之歌爲千古之
式移軍汾上方欲凱旋疑隙之端構於羣小浮言初
起且以强大自嫌邪說又生或謂功高不賞以滋淹
恤因而沉猜撫之若驚論之未解朕以白日旌信明
神鑒心若有負功臣是大欺天下爲人君者豈有此

乎尋聞聚族而謀知欲垂橐入覲其子猶懷反側更
有遷延少年輕佻操履非正私庭跋扈違背君親朔
方義師心如父子怒其懷貳遂共梟懸凶子旣誅大
軍方擾倉皇奔竄遠在邊州察其深衷本無他志蓋
緣憂懼遂至於斯眷念之下無忘鑒寐况勳書盟府
像列雲臺錄功念勞豈以小而累大君臣之義情實
如初厚祿榮班固宜仍舊但以河北諸將自竭忠誠
朔方三軍已有管屬不可更置統領復爲節制其先
任靈州都督府長史單于鎮北副大都護及河北副
元帥朔方節度等使宜竝停其太保兼中書令上柱

國大寧郡王竝如故但當請闕更復何疑再三言提
庶早牽復欲令方寸懸示萬邦爾無我虞朕言不再
久勞于外終必無成收之桑榆殊未爲晚甘言之誘
王者不爲危而悔之將何及矣切令宣示遠副朕懷
大曆七年五月制巴南諸洲仍歲水旱迫於凍餒或
至流離因有剽竊苟全性命懼刑網之所及姑嘯聚
以相依抑有繇焉蓋非獲已末言其弊用軫于懷如
能相率來歸各安生業竝無所問咸許自新宣示中
外咸使知悉

十一月詔如聞巴南道州自頃年以來其有結聚或
攻陷城邑者申明朝旨曉諭令歸各許自新一切不
問庶亦隨材敘用俾效誠勤各復其居勉從所務展
歲時伏臘之祀洽宗黨鄰里之懽人之嘗情當所思
慕必在長吏敦率設法安存勸其農耕恤其疾苦如
刺史縣令有能政字人民使流亡日還戶口歲益宜
委觀察使錄狀奏聞當別加超獎宣示士庶令知朕
意

十一年九月以汴宋節度兵馬使攝節度副使開府
儀同三司鴻臚卿兼御史中丞上柱國蕭國公李僧
惠爲宋州刺史充本州團練守捉使仍封合州郡王

食邑三千戶以大中大夫簡較尚書兵部員外郎兼
侍御史賜紫金魚袋高憑為曹州刺史充本州團練
守捉使以開府儀同三司攝鄆州刺史石隱金為鄆
州刺史充本州鎮遏使仍封維交郡王食邑三千戶
李靈耀之叛也僧惠為之謀主至是相率歸順故有
是命

册府元龜卷之一百六十四終

